

Beat Monn

naschiu il 23-02-1964

mort il 24-01-2003



Vegnü battaglia ei il Beat suenter in pader Beat ch'era da quei temps inagada el calender romontsch. Beat vul dir ord il latin: il fetg ventireivel e che la persuna cun quei num seigi fetg activa, sensibla, empau suspectusa mo porti il cor sin siu maun....

In pop e buob plein veta e gia cun 3 onns va el sco in grond a scoletta tier la sora Geresina. Perfin aunc cura ch'el ha lu giu dad ir a scola gronda, mava el suenter scola spert tier la sora per aunc saver far leu in tec termagls!

Filistucas han mai muncau tier il Beat e ses cumpogns. Ei marschava adina enzatgei nua ch'il Beat era dalla partida - quei duront ed era aunc suenter esser ord scola.

La carriera militara ha el entschiet en cun far duas gadas la musta! L'emprema gada han ei tarmess el a casa ed envidau en el ina proxima gada, lu enta Scuol. Naven da leu eis el ius dalla scala da carriera siado tochen autist/conduider dil major! Quei temps gudeva el e veseva il survetsch militar sco sias vacanzas.

Atgnamein leva il Beat adina vegnir cuschinier, mo las uras da lavur eran per el buca fetg favoreivlas. El havess lu munchentau memia bia dalla veta da sortida.

Aschia sedecida el da far igl emprendissadi da dessignader da construcziun aulta. E sco ei s'udeva fagev'ins silsuenter aunc igl emprendissadi da miradur vidlunder.

La scola era buca sia preferida occupaziun - denton la lavur ton pli. Cun luvrar e barhar ei el s'avanzaus tier il survigilader dallas lavurs da construcziun ed ha luvrau 15 onns tier la medema firma giu el cantun Turtig.

Ils emprems onns da mat vegneva el ensi mintga soli suletta sonda e dumengia e gudeva quels dus dis savens cun notgs libras. Cul temps ein lu ses amitgs setratgs naven ni han maridau ed il Beat ei lu era buca pli vegnien ensi aschi savens. El haveva era baghegiu si ella Bassa siu pign cherchel d'amitgs ed amitgas, ed era vegnien tier in passiunau velocipedist e gudeva siu cuort temps liber cun ir cun velo tras las bialas cuntradas el contuorn da Turtig. Inagada el meins era el denton tuttina aunc ensi per saver guder la buna cuschina dalla mumma ed il ruaus naven da tut il stress. Lu

vegneva ei iu tier il coiffeur, schau far la pedicura e tedlau entuorn las novitads ellas ni el sulegl avon las ustrias.

Il Beat era in um dil plaid fatg. Buca grondas tschontschas e tut stueva ir spert e senza pli gronds «fers».

Matei ch'el havess detg, vesend quella raspada glied tier sia sepultura: «tge tiaters!» El leva buca curdar si e leva mulestar negin.

El haveva priu sia veta en ses mauns e menava ina veta fetg quieta e luvrusa. Dumandar stuev'ins el nuot. Sch'el leva raquintar - lu bien, schiglioc stuev'ins restar vinavon ellas marveglias.

Serraus era el buca, denton mo enviers paucs seservava el propi.

...Per Niessegner ei el seservaus ed ei suandaus el - lez less saver nuot - el sa gie tut. Nus tuts savein aunc adina buca capir ch'el vegn mai pli anavos da sias vacanzas e nus schein encrescher zun fetg per el. El possi dar a nus la forza da puder spitgar sin in bi seveser. Lein salvar el ella megliera memoria ed adina haver in rient e curteseivel Beat avon egl.